



LESOTHO

Office of The Minister,
Ministry of Law and Constitutional Affairs

Telephone: 22311160

Fax: 22311092/22310929

P.O. Box 39
Maseru 100
Lesotho

Phatlalatso ea Litaba

La 22 Phuptjane, 2023

**Tumellano e fihletsoeng ke 'Muso le Baetapele ba Mekha le
Makhotla a Lipolotiki a ka Lekhotleng la Sechaba**

Ofisi ea Mohlomphehi Motlatsi oa Tonakholo, ebile e le Letona la Toka, Molao le Litaba tsa Paramente e tsebisa sechaba hore kamora ho phethela liphutheho tse 'maloa tse ileng tsa tsoaroa ke 'Muso le Baetapele ba Mekha le Makhotla a Lipolotiki ka Lekhotleng la Sechaba mabapi le ho ntšetsa pele leeto la Tlhopho-Bocha, mafapha ana a mabeli a fihletse litumellano tse latelang, 'me e tekenetsoeng letsatsing la la 22 Phuptjane, 2023;

1. Ho itlama ho akofisa ho fetisa Sehlomathiso sa Leshome sa Molao oa Motheo ka Lekhotleng la Sechaba;

2. Ka sepheo sa ho phethahatsa tumellano e fihletsoeng, Bahlomphehi Baetapele ba itlamme ho buisana le Mekha le Makhotla a bona a Lipolotiki le ho e khotlaetsa ho tšehetsa ho fetisoa ha Litemana tse tse ka hara Sehlomathiso sa Leshome sa Molao oa Motheo le ha li ka aroloa ho ea kamoo Paramente e bonang ho hlokahala e le hore li se hohlane le Molao oa Motheo oa Lesotho;
3. Ho itlama ho tšehetsa leeto la Tlhopho-Bocha le kamora ho fetisa Sehlomathiso sa Leshome sa Molao oa Motheo ka Lekhotleng la Sechaba; ho fihlela likarolo tse setseng tsa Tlhopho-Bocha li phetheloa;
4. Ho itlama ho sebetsa ha 'moho le Mafapha ohle a akaretsang a Sechaba ho fetisa Sehlomathiso sena le ho ba le litherisano le ona likarolong tse ling tsa Molao le tse amang Tlhopho-Bocha;
5. Ho sebetsa litaba tsa Tlhopho-Bocha ka tataiso ea meoloane le litšiea tse tataisang leeto lena ele hore bohle ba tle ba qobe lintho tse ka bang le monyetla oa ho sitisa kapa ho liehisa ho fetisoa ha Sehlomathiso sa Leshome sa Molao oa Motheo.

Ho fihlela tumellano ena, 'Muso o ile oa tšoara liphutheho le Baetapele ba Mekha le Makhotla a Lipolotiki ka Lekhotleng la Sechaba ka matsatsi a latelang; la 13 Hlakola, la 8 le la 25 Motšeanong, la 5, la 7 le la 12 Phuptjane 2023.

Letsatsing la kajeno, e leng la 22 Phuptjane, 2023, 'Muso le Baetapele ba Mekha le Makhotla a Lipolotiki ka Lekhotleng la Sechaba ba kopane 'me ba tekenne tumellano eena e fihletsoeng hore na ho tla tsoeloa-pele joang ho fetisa Sehlomathiso sena sa Leshome sa Molao oa Motheo.

Sechaba se tla hopola hore leeto lena la Tlhopho-Bocha le hloka boitlamo bo matla, 'me tumellano e fihletsoeng e holima boitlamo ba hore leeto lena le lokela ho akofisoa 'me likhothaletso tsa sechaba li phethahatsoe molemong oa ho fihlela botsitso, tšireletseho ea sechaba, poelano le khotso ea moshoelella.

